

Talamdan
sa Mga Mensahe alang sa Full-time Training
sa Fall Term sa 2025

LINANGKOB NGA HISGOTANAN:
ANG MAHINUNG DANONG MGA PUNTO SA KAMATUORAN SA MGA SULAT NI PABLO—
FILIPOS UG COLOSAS

Mensahe 7

Magkinabuhi sa Kinabuhing Puno sa Pagkamapailobon apan walay Kabalaka

Basahong Kasulatan: Fil. 4:5-7; Rom. 8:28; Bug. 2:16; 3:11; 22:7, 12, 20

I. “Ipaila sa tanang tawo ang inyong pagkamapailobon. Duol ang Ginoo”—Fil. 4:5:

- A. Giisip ni Pablo ang pagkamapailobon ug kawalay kabalaka nga unang duha ka aspeto sa pagpadayag sa kinabuhing nagkinabuhi ni Cristo.
- B. Nagkaatbang kining duha; ang pagkinabuhi kang Cristo mao ang pagkaanaaay pagkamapailobon nga walay kabalaka.
- C. Ang kabalaka, nga naggikan ni Satanas, maoy sumada sa tawhanong kinabuhi ug nagtugaw sa kinabuhi sa mga magtutuo sa pagkinabuhi nila ni Cristo; ang pagkamapailobon, nga naggikan sa Dios, maoy sumada sa kinabuhing nagkinabuhi ni Cristo.
- D. Kalma, walay kasamok, malinawon, ug hilom ang kinabuhing nagkinabuhi ni Cristo; ang kinabuhing puno sa kasamok kinabuhing nagkinabuhi ni Satanas.
- E. Ang pagkamapailobon mao ang pagkamakataronganon, pagkamahunahunaon, ug pagkamaangayon motagad sa uban, dili higpit gyong moangkon sa balaodnon niyang mga katungod:
 1. Nagpasabot ang pagkamapailobon nga dali ra tang matagbaw, bisan sa mas diyotay ra sa angay untang maato.
 2. Naglakip sab kini sa pagpugong-sa-kaugalingon, pailob, pagkakasarangan, kalulot, kalumo, pagsabot, gugma, simpatiya, kaalam, kaluoy, pagkamalinawon, pagkamapaubsanon, pagsalig sa Ginoo, ug bisan ngani ang maayong gawi sa pag-angkon nga pagbuot sa Ginoo ang tanang butang.
 3. Kon magmapailobon ta, magmaalamon ta ug dunay kahimoan nga mosangkap sa uban sa ilang panginahanglan ug hingpit sab tang mahibalo kon unsay isulti kanila ug anus-a kini isulti.
 4. Ang tawong mapailobon kanunay gyong makapahaom, kanunay gyong angay ang iyang paggawi.
 5. Ang pagkamapailobon paghunahuna man kon unsa unyay epekto sa uban sa buhaton o isulti nato—2 Cron. 1:10; itandi sa 2 Cor. 6:1.
 6. Nagkinahanglag pagkahamtong sa kinabuhi ang pagkamapailobon ug pagkatagbaw ug pagkakontento sab diha ni Cristo.
 7. Segun sa Cristohanong pagsinati, malangkobon-sa-tanan ang pagkamapailobon, kay naglangkob man kini sa tanang Cristohanong maayong gawi.
 8. Isip malangkobon-sa-tanan nga maayong gawi, si Cristo mismo ang pagkamapailobon.
 9. Sa kinabuhi sa panimalay ug sa iglesiahanong kinabuhi, ikinabuhi gyod nato si Cristo sa pagkinabuhi nato sa kinabuhi sa pagkamapailobon.
 10. Kay pagkamapailobon man si Cristo, para ni Pablo ang pagkabuhi mao ang pagkamapailobon—Fil. 1:21a.

11. Ang pagkamapailobon nato mao gyod si Cristo mismo nga gikinabuhi ug gipadako nato.
12. Ang pagpaila nato sa atong pagkamapailobon sa tanang tawo pagpaila man nato kanila sa Cristo nga gikinabuhi ug gipadako nato, nga gihimo natong sumbanan nato ug gipursigir nga tumong nato.
13. Ang pagkamapailobon mao si Cristo nga atong pagkinabuhi.
14. Si Ginoong Jesus ray nagkinabuhi sa kinabuhing puno sa pagkamapailobon, ug si Cristo ra gyoy mahimong hingpit nga pagkamapailobon nato karon.
15. Ang pagpaila nato sa atong pagkamapailobon pagkinabuhi man nga nagpadayag ni Cristo:
 - a. Si Cristo mismo kanang kinabuhia nga kinatibuk-an sa tanang tawhanong maayong kagawian.
 - b. Ang labing maayong pulong nga magsumada sa kinatibuk-an sa tawhanong maayong kagawian ni Cristo mao ang *pagkamapailobon*.
16. Kon buot tang magkinabuhi nga walay kabalaka, kinahanglang makaamgo ta nga tanan natong sirkumstansya, maayo ba o dili, gitudlo sa Dios kanato aron moalagad nato sa pagtuman sa atong palad nga makabaton ni Cristo, magkinabuhi ni Cristo, ug magpadako ni Cristo—Rom. 8:28; Mat. 10:29-30; 2 Cor. 4:16-18.
17. Kon ikinabuhi nato si Cristo adlaw-adlaw, walay luna ang kabalaka dinhi nato.
18. Kon wala ta mausa sa Ginoo sa praktikal gyod, makasamok nato ang halos tanang tawo, tanang hitabo, ug tanang butang.
19. Nagkinahanglag pag-ampo ang pagkamapailobon.
- F. Kalma nga kinabuhi ang hustong Cristohanong kinabuhi:
 1. Ang unang aspeto sa kinabuhing nagkinabuhi ni Cristo mao ang pagkawalay-kasamok, walay pakig-indigay, kawang nga garbo, pagbagulbol, o pangatarongan.
 2. Kana nga Cristohanong kinabuhi wala gyoy panaglantugi, panaglalisay, o pakig-away ba sa uban.
- G. Human gyod mamulong kalabot sa pagkamapailobon, niingon si Pablo nga duol ang Ginoo:
 1. Sa dapit, duol ang Ginoo nato, andam nga motabang; sa panahon, duol na Siya, moabotay na—Bug. 2:16; 3:11; 22:7, 12, 20.
 2. Ang pagkaduol sa Ginoo labi gyong nagpasabot sa presensya Niya uban nato.
 3. Labi tang makaamgo sa pagkaduol sa Ginoo, labi sab tang matagbaw ug labi nga magmahunahunaon sa uban ug malipayong magmakataronganon kalabot sa ilang kahimtang.

II. “Ayaw kabalaka sa bisan unsa”—Fil. 4:6a:

- A. Sagad nga kon makadungog tag dili maayong balita, mahangawa ug mabalaka ta.
- B. Makadaot sa pagkinabuhi nato ni Cristo ang kabalaka.
- C. Imbis mabalaka, “sa tanang butang, ipahibalo lang pinaagi sa pag-ampo ug pagpangamuyo uban sa pagpasalamat, ang inyong mga hangyo sa Dios” (v. 6b), unya “ang kalinaw sa Dios, nga labaw sa tanang pagpanabot sa tawo, magbantay sa inyong kasingkasing ug sa inyong mga hunahuna diha ni Cristo Jesus” (v. 7).
- D. Sa Mateo 6:19-34 morag naghigot ang Ginoo sa tinagdan sa katawhan sa gingharian sa materyal nga bahandi; sa pagkatinuod, naghigot Siya sa kabalaka: “Ayaw kabalaka alang sa ugma, kay magkabalaka ra ang ugma sa iyang kaugalingon”—v. 34a.
- E. Walay kabalaka diha sa diosnong kinabuhi ug diosnong kinaiya; iya sa tawhanong kinabuhi ang kabalaka.
- F. Kinabuhi sa kabalaka ang tawhanong kinabuhi nato, samtang kinabuhi sa pagpahimulos, pahulay, kahayahay, ug katagbawan ang kinabuhi sa Dios.
- G. Diha sa Dios wala gyoy kabalaka; sukwahi niini, inumol sa kabalaka ang tawhanong kinabuhi nato.

- H. Sukaranong problema sa atong tawhanong kinabuhi ang kabalaka.
- I. Tungod sa kabalaka nahigugma ta sa materyal nga mga butang; kon wala tay kabalaka, dili ta magtagad sa materyal nga mga butang.
- J. Sa nagtuman ta sa atong tawhanong kaakohan, dili gyod ta mobuhat og bisan unsa tungod ug alang sa atong kabalaka, kay duna man tay diosnong kinabuhi nga wala makailag kabalaka.